

四庫全書

集部

欽定四庫全書

集部

文章辨體彙選卷一百十三

詳校官中書臣張經田

主事銜臣徐以坤覆勘

總校官檢討臣何思鈞

校對官學正臣翁樹棠

謄錄監生臣黃臣鵠

欽定四庫全書

文章辨體彙選卷一百十二

明 賀復徵 編

疏二十六

表忠義以維持世道疏

明 楊僕

臣聞忠義之士殺身成仁舍生取義天柱地維賴以奠立聖帝明王急先袞表以維世範俗者也是以史傳所載貞臣烈士心事彪炳至今讀之古道光華照人顏色

然豈獨古人之能爾哉我國初死節之臣生氣凜然表  
表可錄褒崇之典實有待夫今日者矣臣自少時傳聞  
父老談及革除之變時當事之臣若尚書鐵鉉張紘陳  
迪齊泰侯泰侍郎卓敬胡子昭黃觀郭任陳性善都御  
史景清練子寧茅大芳大理寺少卿胡閔寺丞鄒瑾太  
常寺卿黃子澄少卿廖昇盧原質侍讀方孝孺妻璉修  
撰王叔英給事中陳繼之龔泰黃鉞戴德龔韓永御史  
高翔曾鳳韶魏冕王度葉希賢中書舍人朱和郭節梁

良玉何申郎中梁田玉主事巨敬布政使張昺按察使  
王良副使程本立僉事林嘉猷知府姚善陳彥回葉惠  
仲長史劉璟紀善周是修斷事高巍知縣顏伯瑋鄭恕  
教授陳忠賢教諭王省都指揮馬宣朱鑑等雖職有崇  
卑委任不一要之均能奮不顧身以義自殉視死如歸  
不為勢屈或先事而矢謀或臨危而抗節或竭力而固  
守或同心以赴義或從容自殞或慷慨就刑或竄身海  
濱或結誠庠序誠天地間正氣中流砥柱方駕古人無

少愧者也而錄忠詔後尚為缺典此臣竊為之嘆不得  
不汲汲與之哀鳴而干瀆聖聽者也且當其時而死其  
事者臣之分也天地之義也盡吾之心固無較於人之  
知與不知也哀其死而錄其忠者君之仁也天地之道  
也所以教天下後世之為人臣為人子者不可一念而  
忘忠孝之心也君義臣忠各盡其道焉耳仰惟聖明御  
極百度惟貞凡可以風勵天下之道罔不欲修舉而推  
行之俾萬邦臣庶知所自奮若夫錄精忠於既往啟人

範於將來關係風教豈小補哉臣敢據厥愚憫冒昧上  
言伏乞皇上務憫羣忠立準萬世勅下廷臣詳為萬古  
計議旁求博訪務俾不遺各舉所知類疏上聞果與臣  
言相孚乞將鐵鉉張紘等死忠實跡付史局編校載在  
史籍以垂諸不朽仍念其盡忠所事各追贈官謚錄用  
其子孫俾所在有司創立祠宇以時享祀則鐵鉉等孤  
忠勁節轟烈天地英魂義氣光臨俎豆九原之下雖死  
猶生皆陛下賜也天下後世將莫不曰鐵鉉等真忠臣

也知而錄之自陛下始也凡懷忠義者莫不欣欣然感激爭自奮發矣夫仁莫先於恤死教莫大於表忠一舉而仁道立教化行人才之盛亦因以見此帝王盛節萬代所瞻仰者也千載休期時難再得臣不勝懇切願望之至

稽古樂以裨盛典疏

廖道南

臣伏考我太祖高皇帝諭曰治天下之道禮樂二者而已若通於禮而不通於樂非所以淑人心而出治道達

於樂而不達於禮非所以振紀綱而立大中禮樂並行  
而後治化醇矣臣嘗莊誦竊歎以為聖祖獨稟全智超  
越千古允升大猷參贊萬化故至治馨香達於神明休  
徵駢疊登諸史冊禮樂百年而後興信有由矣恭惟皇  
上建中致和體信達順光紹聖祖之丕圖載舉隆古之  
盛典禮崇三重樂備四郊邇者宸翰飛洒親撰圜丘樂  
章昭煥乾文發揮妙比之絃管協乎律呂真有以動  
天地而感神明矣臣惟古帝王之樂莫善於虞莫盛於

周書曰子欲聞六律五聲八音在治忽以出納五言汝聽周官大司樂以六律六同五聲八音六舞大合樂以致鬼神蓋聖人作則必以天地為本天數五地數五五位相得而各有合天五與地十合而生土其聲為宮地四與天九合而生金其聲為商天三與地八合而生木其聲為角地二與天七合而生火其聲為徵天一與地六合而生水其聲為羽五聲相生旋相為宮於是乎播之以八音所以宣八風之和聲也諧之以十二律所以

順四時之和氣也有元氣而後有和氣有元聲而後有和聲聲和則氣和氣和則形和形和而天地之和應矣臣請以古樂可行於今與夫今樂有戾於古者言之樂律之制陽律從乾陰呂從坤故奏黃鐘歌大呂以祠天神奏太簇歌應鐘以祭地祗奏姑洗歌南呂以祀四望奏蕤賓歌函鍾以祭山川奏夷則歌小呂以享先妣奏無射歌夾鍾以享先祖蓋人聲與樂聲相比而疾徐高下各有其節今之樂律則職掌於太常寺協律郎傳之

既久而浸失其初意用之既殊而不得乎元聲其陰陽配合之禮律呂子母之義恐未必盡然也古者樂舞之設文舞羽籥武舞干戚故祀天神則舞雲門祭地祇則舞咸池祀四望則舞大磬祭山川則舞大夏享先妣則舞大濩享先祖則舞大武蓋樂舞與樂律相應而綴兆疾徐咸中其度今之樂舞則隸籍於太常寺樂舞生朱干玉戚其會之於服冕幘旄舉弗辨之於佾其於樂師六律之儀舞師四舞之節恐未必盡然也古者大享之

禮所以親君臣也周禮王宮縣九享食奏燕樂歌工在  
上舞位在下琴瑟在堂鐘鼓在庭各從其類無相奪倫  
今大祀慶成設宴於奉天殿教坊司承應雅俗混淆優  
侏儒獮恐非所以祗承上天之餘惠也古者藉田之禮  
所以重農事也周禮王出入則奏王夏司空除壇農正  
陳藉鬱人薦鬯犧人薦醴各司其事無相越職今躬耕  
藉田設樂於先農壇教坊司承應羣伶紛擾衆劇喧豗  
恐非所以表率下民之先務也凡此數者雖載諸令甲

相沿有年而關係非輕釐正宜急宋儒周敦頤曰樂者古以平心今以助慾古以宣化今以長怨不復古禮不變今樂而欲致治者遠矣皇上法古帝王行古典禮天地日月之祀既以復其初朝廷未盡合乎古記曰作者之謂聖述者之謂明聖人在上必有所作矣或謂元聲難知古樂難復臣歷考經籍樂家之說尚在也論樂之本則有若樂記載樂之文則有若禮儀自周之降雖失其傳然司馬遷撰律歷志班固宗之是故有三統之論

蔡元定著律呂新書朱子稱之以為成一家之言若陳祥道  
樂書則又備載古今之制而無遺者也然欲求元聲當  
求諸經易曰雷出地奮豫先王以作樂崇德夫雷也者  
運天地之元氣以鼓萬物之出機者也知雷之元氣之  
所以發則知樂之元氣之所以宣矣舜命夔曰詩言志  
歌永言聲依永律和聲我聖祖謂熊鼎曰樂以人聲為  
主人聲和即八音諧矣斯訓也萬古不易之至論也記  
曰知聲而不知音者禽獸是也知音而不知樂者衆庶

是也臣非知樂者也姑述所聞按諸樂書條為之說一  
曰稽五聲以正八音二曰稽八音以正十二律三曰稽  
十二律以正旋宮若歷代諸家之說亦互有得失先儒  
許衡固有定論矣臣等不敢備述謹繹其義附錄進呈  
仰冀聖明俯垂采擇

勅劉瑾疏

楊守隨

臣嘗聞孟軻氏言一正君而國定矣又聞之周穆王言  
實賴左右前後有位之士匡其不逮然化行法立必繇

於君德之正而奸邪之進亦每為君德之累蓋姦佞邪  
僻足以惑心移志日滋月潤至於廢法梗化而禍患之  
興後有不可言者有不可為者在明者所宜早辨而預  
防之况其幾已著其事已成其勢已盛者乎譬之癰生  
肘腋既不能消其毒於未膿之先而又不能蕩其穢於  
既膿之後必成心腹之患矣是故今日之事臣不得不  
痛哭誓死為陛下極言之也臣伏睹陛下春宮育德之  
時英明煥發有過人之稟早夜嗜學有希聖之功親禮

師儒有重道之志辨別君子小人有不惑之明不近左右佞倖有剛正之操天下臣民仰之以為今日太平之望而先皇帝龍馭之時宣二大臣至寢御顧命諄諄俾盡心輔佐此臣等所共聞而陛下所親見言猶在耳陛下嗣位之初率繇舊典間出一二新政快洽人心天下稱頌以為先皇帝道隆周成漢文而陛下德踰康王景帝宗社甚幸臣民甚幸夫何數月以來左右近臣不能祗承德意盡取先朝良法美政而更新之盡誣先朝

近臣碩輔而刻汰之政日以非法日以隳而天下嗷噭  
莫知措其手足怨咨之氣致生災變天鳴於上地動於  
下五星凌犯於宵中辰宿顯現於旁午彗星直穿於北  
斗太陽蝕於開歲之首桃李花於季秋之月雷擊奉天  
鷗吻雨墮留都皇牆古今罕見之災交集數月之内夫  
人事感於下則天變應於上陛下獨不思其故乎今陛  
下朝夕之所與處者何人所與言者何說所與行者何  
事勿謂遂處清穆之內人無得而知之也問命曰侍御

羣僕罔非正人以旦夕承弼厥辟呂氏以為陪僕督御  
之人後世視為賤品而不知擇焉者殊不知人君朝夕  
與居氣體移養常必由之故周公作立政而歎其知恤  
者鮮今內臣劉瑾馬永成張永丘聚羅祥魏彬谷大用  
王岳等八人各以姦險之性巧佞之才希旨導諛誣上  
罔下始焉猶乘間伺隙以逞已私終也至恣意肆志而  
無忌憚時人目為八虎惟王岳僅知畏人少避而劉瑾  
者尤為威猛而鋸牙善噬者也夫虎之能噬人也人皆

知之而陛下獨與之聚處馳逐又親信而愛護之正所謂養虎以自貽患者也今此八虎日以逸遊荒樂之事導陛下日以謫佞承奉之言諛陛下或於西海子擎鷹搏兔或於南城內蹕峻登高或胡服而招騎射或飾像以作躡趺禁內鑼鼓之音聞於遠邇宮中火砲之聲徹於晝夜搬演雜劇混貴賤而不分假降師巫淆尊卑而無別引車騎而供執鞭之役宣尼所不為者今為之矣列市肆而親商賈之事仲連所不忍者今忍之矣巧飾

百端之技覬中九重之欲雖以陛下天資之英敏聖性之剛明自有主宰不為搖惑然而鮑肆蘭室齊街楚語臣尤恐不能不為之潛移而默奪之也近者日高而大朝未臨漏盡而宮寢未御豈其萬幾之繁至無一刻之暇乎陛下誠試思之今日希望之學重道之志果如前日之勤否乎所進用者果君子所放斥者果小人否乎發號施令果動遵祖宗之成憲先帝之遺意否乎勿謂四方臣妾惟令之從人無得而議之無得而違之也事

出不經理宜改正而此數人者方且叨皇上之親幸攬  
天下之威權恣行暴虐詐傳詔旨放逐大臣刑誅臺諫  
邀阻實封使言不上聞簧惑聖聽使恩不下究大開賄  
賂之門擅專賞罰之柄傳奉官員至百千人之衆募招  
武勇至五六歲之童引謀畧之士為牙爪盡與金貂紫  
綬結姦邪之人為心腹濫賜玉帶蟒衣或奏帶鹽引私  
為興販或奏討地場大興土木或索取官庫銀兩或冒  
派織造錢糧義男贅婿悉叨金紫之榮愛卒幸童皆荷

貶璫之貴附已者進祿加官忤意者貶爵奪職罪重者  
有厚賂則反得陞官功多者無重賄則反為貶職內外  
臣僚惟瑾勢之是趨天下人民惟瑾威之可畏向也二  
三大臣受遺夾輔今則有潛交默附而漏泄事情者矣  
向也南北羣僚矢心痛恨今且有畫策主文而依阿時  
勢者矣且其數易邊境武畧之臣大更各省鎮守之職  
志欲何為事最易見伏望陛下遠鑑漢唐宋之禍近觀  
曹吉祥之事以杜後虞以防他變臣於前月會同府部

院司公卿僚佐具本力陳其罪伏鑽闕下以俟聖裁中  
官傳旨憇免臣等俯伏至以死請逮於日旰之後方荷  
處分之旨臣等歡呼萬歲而退以為必正典刑更無可  
疑不數日而傳旨使之各任以事或操練團營或行事  
兩廠或僉書司禮或署掌印綬或綜理御用倒持太阿  
授之以柄皆兵財機務之地政事根本之區大雅蕩之  
詩所謂蠱賊內訌昏椓靡共潰潰回遹實靖夷我邦者  
此也陽為遠放而陰近之名為疏斥而實親之政柄一

入其手姦邪益中其心今天下之怨方深事勢之危已甚而且大行殺戮大肆貪淫大輸財賦大啟徵科庫藏竭於官財力匱於民武勇疲於邊上下胥讒神人共憤而瑾之心方恣而未已瑾之惡方稔而不悛以前日而擬今可據今而度後夫人情罕自足之戒而小人無知止之心觀其事勢若不及今撲滅後必將有不可言之事不可圖之勢易曰履霜堅冰至夫陰氣始結何遂至於水凍而冰堅亦言馴致其道以至是耳故周公致戒

於畜之五曰贍牙則吉於垢之五曰以杞包瓜今日事  
勢正此之類伏望陛下獨斷乾剛大施渙號將此數人  
拿送法司明正典刑速鑒延熹既往之愆母使臣蹈蕃  
武已覆之轍豈惟臣一人之幸也仍查內官凡有在八  
虎名下及與相厚善者悉放出之以絕其萌蘖之禍別  
選廉慎端恪之人以備左右使令之後則所謂左右僕  
御罔非正人而出入起居罔有不欽發號施令罔有不  
臧者矣將見君德自無不正法度自無不明治化自無

不清比隆唐虞媲美三代而何成康文景之足言哉天下萬世之幸也臣不勝迫切忠懇之至

條陳邊計疏

楊博

准兵部咨該內閣傳奉聖諭朕看得東西二鎮外兵搶殺至甚防遏之計如何預處卿等會文武羣臣着實詳議來看欽此欽遵節該本部覆議合再通行大小官員據忠殫慮破格講求各令刻期具奏容臣等酌量緩急會同內閣并五府九卿科道各官逐一詳議列欵上請

取自聖裁等因題奉欽依備咨前來臣等切惟強敵匪  
茹分道憑陵東犯薊鎮則九重震驚西犯偏關則三晉  
騷動搶殺至甚誠如聖諭荷蒙皇上軫念生靈日勤宵  
旰特諭輔臣公同臣等詳議預防之計臣等雖至愚極  
陋目擊時艱敢不祗承自昔邊防不過戰守二端而各  
邊地勢不同戰守亦自互異即如薊州昌平保定三鎮  
有牆可恃敵難保其不來但當乘高據險使之匹馬不  
入即為上策山西宣大遼東四鎮無牆可恃敵難保其

不入但當堅壁清野使之一毫不得即為中策臣博臣  
本固臣士儉連日面相酌議除重將權明軍令修城堡  
等項事宜已經各官條奏不敢概及外謹將東西六鎮  
戰守之機其大且要者列欵上陳伏望聖明特賜省覽  
敕下該衙門會官詳議裁定施行及照奉旨建白者臣  
等之事也詢謀參酌者輔臣本兵之任也至於削去虛  
文力求實効者則總督鎮巡兵備將領之責也若使臣  
等言之輔臣本兵議之邊臣不肯力任其事或明肆異

同或陰行規避紙上空談譬之畫餅竟何益於安攘之  
效所據責成邊臣同心寅恭實心幹理乃今日之第一  
務也又念兵凶戰危人情所難朝廷所以驅策之者惟  
在賞罰有功不賞人固弗勸有罪不刑人孰肯輕蹈白  
刃之禍哉近歲薊鎮潘家口磨刀谷失守總督王杼楊  
選相繼棄市而總兵參將遊擊反從末減是以今歲邊  
警屢稱竟無一將請纓而死可以見其情實矣頃蒙  
宸斷逮繫鎮巡人心始知警惕而副參等官田世威劉

寶胥進忠吳光裕等分有信地不能固守其罪尤重亦當先行收問合行將田世威等提拿到京法司查照所犯一併擬罪以為邊臣縱寇殃民者之戒臣等不勝懇切祈望之至

一定薊昌守牆之議薊昌二鎮因山為牆延長幾二十里自庚戌邊警以來屢經修繕河防口古北口黑谷關一片石等處拒回大敵明有徵驗近因敵騎潰牆說者遂謂牆不可守是誠因噎而廢食也蓋前年牆子嶺失

守乃通州官軍今歲界嶺口失守乃河間官軍守兵單  
弱援兵不至此調度之失宜豈可歸罪於牆哉合無聽  
總督侍郎曹邢輔督同鎮巡等官趁此冬閒躬履邊垣  
逐一閱視稍有不備即為修補春秋兩防將調到入衛  
邊兵分營配搭每路各得一千名駐劄適中地方猝  
遇敵衆攻墻令其併力戰守彼仰面而攻我乘高而擊  
敵騎雖強恐亦未能飛渡

一定宣府南山之議宣府東路咫尺昌平其四海沿岔

道八達嶺等處俱有通賊要路總督軍門統領重兵拱護南山實以陵京為重連年關外增設墩牆深得重門待暴之義近議紛紛欲將兵馬列於張家口左右衛等處俟其南下方守南山失策甚矣合無備行總督都御史王之誥督同鎮巡等官今後春秋兩防仍照成議謹守南山以慰君父宵旰之懷不得藉口外防致遺內患一定山西擺列之議雁門寧武偏頭三關均為山西門戶雁寧二關外有大同尤稱屏障偏頭一關西連延綏

獨當其衝先年寧雁一帶添築邊牆增兵戍守未為無據然邊長八百餘里原守官兵民壯不滿數萬名曰擺邊實為故事固未見其倚牆拒守如薊昌二鎮真能遏敵之歸者也蓋薊昌合諸鎮之力為守頗易山西止一鎮之力為守實難今該給事中張說議罷擺邊得之目擊非臆說者但事在閩外遽難遙斷合無聽總督都御史王之誥督同鎮巡等官虛心酌議務求長便具實奏聞如果可罷每歲秋防官軍民壯止宜屯駐適中地方

遇有邊警相機戰守以保萬全

一定保鎮防守之議紫荆倒馬龍泉諸關層峰疊障頗稱天險且藉宣大為之屏蔽寇若南犯諸關勢必經由二鎮即使介馬而馳亦須數日可到但當明其耳目養其銳氣如果寇犯宣大已入南內邊內窺洪蔚保安靈丘廣昌等處然後乘牆拒守斯為得策近年以來先朝擺邊不惟空勞士馬亦且糜費芻餉合無聽總督侍郎曹邦輔督同鎮巡等官每遇春秋兩防預將兵馬分定

地方照常操練必須的有警報方可登牆以成以逸待勞之計

一定大同搗巢之議大同地方外連朔漠與敵為鄰敵犯山西保定勢必由之先年總兵官梁震每遇敵入輒率勁兵出邊搗巢故終震之任敵即入關不敢久駐蓋牽於內顧耳合無備行總督都御史王之誥督同鎮巡等官今後敵果深入發兵搗巢冬春當敵馬弱之時彼雖不犯我境間亦搗之亦不為過有功破格陞賞縱有

敗衄不當輒加閒邊啟釁之罪至於宣府亦可倣而行之蓋總兵馬芳驍勇不減於震戮力報國此其時也

一定遼東積貯之議遼東一鎮濱海近敵中通一線之路一切兵食悉皆仰給本鎮之產且地甚肥饒收成常稔但鎮人愚昧不肯少為積蓄之計豐收之年粒米狼戾一遭凶荒坐而待斃如嘉靖三十八年三十九年人至相食既不足兵自難振何以責其敵愾之功合無備行巡撫都御史魏學曾督同守巡兵備等官多方設

法令其開墾荒蕪每遇年豐穀賤處發官銀糴買收貯  
仍教諭民間照依江南規則各自蓄積務為一年三年  
之備惠而不費事在可行

建言疏

何孟春

臣少觀古史聖君之世必無以言得罪者聖世之臣必  
無以言為諱者蓋言者得罪而言始為諱也人臣以言  
為諱其非聖世可知仰惟皇帝陛下踐位以來圖求治  
理省覽章疏採愚者之慮擇狂夫之言數年之間下興

敢言之風上有弗咈之美三代而後臣不謂重有今日  
臣生適聖君之世又為聖世之臣叙烈揚休情無已已  
而今月十三日事乃有深為陛下惜者臣始聞科道官  
待罪闕下不信久之朝無諱言此其時也科道近來不  
聞以言得罪者既而詔下錦衣衛獄臣詢諸道路緣岷  
王奏稱武岡知州劉遜違法事情科道為之分釋有乖  
宸斷以至於此夫岷王所奏陛下不加體勘便差官拏  
解劉遜赴京陛下於待宗支厚矣科道共論所奏未委

虛實乞免差官校陛下又并科道下諸理臣則以陛下  
為過於厚宗支也夫過於厚宗支猶不失為陛下盛德  
而外間傳言至謂陛下素不罪言者今乃有此事由科  
道前曾阻倅臣之進不當聖心杜貴戚之求久蓄聖怒  
故耳臣益惑焉陛下前於科道劄子不惟不罪而又聽  
之此何謂哉陛下本厚宗支而過卒致臣下之言如此  
則臣所以不能不為陛下惜也科道惟習熟陛下必不  
罪言者感激自許以不諱言為職小大廢政然否之際

輒形諸論列事體差謬豈能無之十三日之事臣非敢謂言者不當得罪而恐臣下自此以陛下為罪言者將遂以言為諱也科道在今職為言路陛下今因其言之失而罪之失止一事而連坐者五六十人國體不無少傷公論不無少挫挫公論傷國體而聖治自此少虧矣編修羅玘御史張淳有見於此曾各具本親齋冀徹旒冕載回成命伏闕惴惴以俟逾三日不得報臣用是復有請焉陛下恩遇臣子如腹心手足痛癢切於一體今

之逮繫科道庸知不朝怒夕霽陽光驟照於既霜之餘  
而臣等輩妄陳讟縷於聖聽草茅耿耿益不昧於懷也  
抑臣又有為陛下慮者科道衆官逮繫久矣令行夏正  
暑氣炎熇狴犴迫隘毒蒸如炙萬分一有沾疾而瘐死  
者陛下何以忍之論罪不至死而死當其在獄聖世有  
諫臣如此臣不識陛下何辭以謝天下伏願陛下含垢  
納污廣山澤之量早賜詔旨從輕發落使下不墜敢言  
之風陛下亦終始全從諫弗咈之美天下幸甚倘以臣

言不足聽而復遲之命下之日又非臣所請者朝野觀望誰不乾沒為心自全為計等水危於隨波同伏馬之食豆而肯更批龍鱗料虎口捐不貲之軀以蹈不測之禍耶臣瞻天仰聖無任戰慄之至

從衆論以塞禍源疏

王璜

邇者浙江鎮守太監鄧文奏乞換給勅書始而該科執奏於前繼而科道交論於後人言雖衆聖意未回事關安危不容遽默故敢不避狂愚再贅聖聽臣等竊惟天

下之事所以行之者三曰理曰法曰勢背於理則不可行違於法則不敢行阻於勢則不能行以是三者而律鄧丈之請殆無一可者焉丈之請也固欲兼管銀場矣銀場利之聚也文要兼管將為國而利之乎抑為已而利之乎為國而交征利者必危為已而放於利者多怨曰怨曰危俱是厲階於已於國兩無所據欲兼理詞訟矣在外之詞訟有司理之按察司總之而詳允於撫按文欲兼理其亦會同撫按乎抑亦任情而為之乎會同

則非文之心任情即成民之亂以理為請而乃以亂終之可乎欲參職官及罷閑官吏矣鎮守各官而乃參提行事是鎮守而撫按也不知撫按其將何事况罷閑之官已無官守罷閑之吏即係編氓彼有何事而亦欲參提之耶此理之不可者也大明律內一欵曰在外五品以上官有犯奏聞請旨六品以下聽巡按御史按察司并分司取問是鎮守不得參提官吏也問刑條例內曰在外詞訟除叛逆機密重情許鎮守受理外其餘不

許濫受是鎮守不得兼理詞訟也以此推之鎮守不得兼銀場亦明矣夫律定於太祖高皇帝例行於列祖而經孝廟圈點頒行者也丈能知祖宗百世之律例乎此則法之不可者也財者民之心也管銀場則傷其心矣固未有傷民之心而可以治者也理訟拿官則奸宄者將挾訐薦賄以求逞善良者皆積怨含憤而罔伸世未有惠奸宄賊良善而可以治者也夫理不可法不可勢不可而鄧丈乃肆為欺罔甘於首禍朦朧而請之罪固

不容於誅矣向使該部見其詞語含糊少加察焉而執奏之則當事未定之先未必不可救正而乃輕舉妄動即與會敕及因該科之執奏然後徐起而復題曾謂堂本兵國之司命而舉事草草一至於此哉若曰不知是謂不智知而會之是謂不忠不智不忠焉用彼相若該部者亦有不得辭其責者矣伏乞陛下因臣等之言覽前後之奏審事機察利害將勅書收回明正鄧文之罪戒飭該部之悞惟期治道之有成毋拘成命之已發

則天下幸甚宗社幸甚

正典禮疏

張孚敬

臣切謂孝子之至莫大於尊親尊親之至莫大乎以天下養伏惟皇上應天順人嗣登大寶迺即勅議追尊興獻王以正其號奉迎聖母以致其養此誠孝子之心有不能自己者也茲者朝議謂皇上入嗣大宗宜稱孝宗皇帝為皇考改稱興獻王為皇叔父興獻太王興獻王妃為皇叔母興獻王太妃者然不過拘執漢定陶王宋

漢王故事謂為人後者為之子不得復顧其私親之說耳伏承聖諭以此禮事體重大令博求典故務合至當之論臣有以仰見皇上純孝之心矣比有言者遂謂朝議為當恐未免膠柱鼓瑟而不適於時黨同伐異而相當於理臣固未敢以為然也夫天下豈有無父母之國哉臣創立清朝發憤痛心不得不為皇上明辯其事記曰禮非從天降也非從地出也人情而已矣故聖人緣人情以制禮所以定親疎決嫌疑別異同明是非也夫

漢之哀帝宋之英宗乃定陶王濮王之子當時成帝仁宗無子皆預立為皇嗣而養之於宮中是尚為人後者也故師丹司馬光之論施於彼一時猶可今武宗皇帝已嗣孝宗十有七年比於崩殂而廷臣遵祖訓奉遺詔迎取皇上入承大統豈非以天下者祖宗之天下天下之天下也臣伏讀祖訓曰凡朝廷無皇子必兄終弟及夫孝宗興獻王兄也興獻王孝宗親弟也皇上興獻王長子也今武宗無嗣以次屬及則皇上之有天下真猶

高皇帝親相授受者也故遺詔直曰興獻王長子倫序當立初未嘗明著為孝宗後比之預立為嗣養之宮中者其公私實較然不同矣或以孝宗德澤在人不可無後夫孝宗誠不可忘也假使興獻王尚存嗣位今日恐弟亦無後兄之義夫興獻王往矣稱之以皇叔父鬼神固不能無疑也今聖母之迎也稱皇叔母則當以君臣禮見恐子無臣母之義禮長子不得為人後况興獻王惟生皇上一人利天下而為人後恐子無自絕父母之

義故在皇上謂繼統武宗而得尊崇其親則可謂嗣孝  
宗以自絕其親則不可或以大統不可絕為說者則將  
繼孝宗乎繼武宗乎夫統與嗣不同而非必父死子立  
也漢文帝承惠帝之後則以弟繼宣帝承昭帝之後則  
以兄孫繼若必強奪此父子之親建彼父子之號然後  
謂之繼統則古嘗有稱高伯祖皇伯考者皆不得謂之  
統矣或以魏詔謂由諸侯入奉大統則當明為人後之  
義殊不知曹叡是時尚未有嗣其詔蓋預為外藩援立

者坊此有為之私非經常之典也可槩論乎故曰禮時為大順次之不時不順則非人情矣非人情則非禮矣臣竊敢謂今日之禮宜別為興獻王立廟京師使得隆尊親之孝且使母以子貴尊與父同則興獻王不失其為父聖母不失其為母矣夫人必各本於父母而無二議禮者亦惟體之於心而已今者不稽古禮之大經而泥末世之故事不守祖宗之明訓而率曹魏之舊章此臣之所未解者也雖然非天子不議禮今皇上虛己宏

大疇咨衆言倘以朝議為禮之當稱號一定不可復易  
且將使天下後世之人皆知以利為利而自遺其父母  
疑非永言孝思孝思維則之謂也臣竊惟此禮乃天經  
地義萬代瞻仰毫釐之差千里之繆故大臣平章小臣  
獻納皆分之宜也書曰有言逆於女心必求諸道有言  
遜於女志必求諸非道夫逆心之言疑於忠而未必皆  
道也遜志之言疑於諛而未必皆非道也臣愚豈敢尊  
諛君上以自誤於不忠又豈敢昧於自獻以誤君於不

孝惟聖明體察而裁決焉臣不勝懇切聽命之至

廟議疏 張孚敬

臣伏惟皇上以大孝之心議尊親之典初因廷臣執論聚訟四年更詔三遍蓋自漢宋以來之君所不決之疑至皇上決之所未成之禮至皇上成之真可謂洗千古之陋垂百王之法者也是以新詔傳宣愚氓不應蓋禮必如此然後合乎天理之正即乎人心之安也茲光祿寺署丞何淵妄肆浮言破壞成禮稱獻皇帝為所自出

之帝請立世室列祀太廟此何言也臣與廷臣抗論之初即曰當別為興獻王立廟京師又曰別立禰廟不干正統此非臣一人之議天下萬世之公議也今何淵以獻皇帝為所自出之帝比之今之德祖請立世室比之周文王武王不經甚矣皇上聰明中正諒已察之茲言也上干九廟之威監下駭四海之人心臣不敢不為皇上言之昔漢哀帝追尊父定陶共王為共皇帝立寢廟京師序昭穆儀如孝元帝是為干紀亂統人到於今非

之今何淵請入獻皇帝主於太廟不知序於武宗皇帝之上與序於武宗皇帝之下與孝宗之統傳之武宗序獻皇帝於武宗之上是為干統無疑武宗之統傳之皇上序獻皇帝於武宗之下又於繼統無謂何淵所請此何言也如謂太廟中不可無禰漢宣帝嗣昭帝後昭為宣之叔祖史皇孫嘗別立廟未聞有議漢宗廟無禰者蓋名必當實不可強為也如謂獻皇帝廟終當何承臣謂由皇上以及聖子神孫於太廟當奉以正統之禮於

獻皇帝廟當奉以私親之禮尊尊親親竝行不背者也  
先儒謂孝子之心無窮分則有限得為而不為與不得  
為而為之均為不孝皇上追尊獻皇帝別立廟者禮之  
得為者也此臣所以昧死勸皇上為之也入獻皇帝主  
於太廟者禮之不得為者也此臣所以昧死勸皇上不  
為之也夫成禮則難壞禮則易伏乞皇上念此禮大成  
原出聖裁匪由人奪何忍一旦遽為小人所破壞邪

重制誥疏

張孚敬

臣切惟制誥者王言也知制誥者臣職也知制誥而使王言不重則不得其職矣臣按國初以来成化以前制誥之體猶為近古明徵履歷宣昭事功其於本身者不過百餘字其單恩祖父母父母并妻室者不過六七十字言之者無費辭受之者無媿色近來俗習干求文尚誇大藻情飾偽張百成千至有子孫讀其祖父母父母誥敕莫自知其所以然者卒使萬乘之尊下譽匹夫匹婦之賤良可惜也孔子曰天下有道則行有枝葉天下

無道則辭有枝葉今當聖明之世可使制誥之文為枝葉之辭哉伏乞敕下內閣自今以後凡為誥敕必須復古崇實一切枝葉浮誇之辭盡行刪去庶王言重而人知所勸矣

救張延齡疏

張孚敬

臣因張延齡事情不能積誠上悟聖心罪當萬死萬死伏思他人可委之無言臣受恩深重惟應死報皇上視臣有手足之親託臣以心膂之寄臣不盡言以發機緘

以明是非則臣負恩之罪萬死莫贖矣本月十一日伏  
蒙聖諭謂延齡皇伯考懿親祇宜守分猶有餘歡乃包藏  
禍心謀為不軌是何道也并所奉皇伯母傳諭錄示臣  
等作速議處因法司會問招詞未成不敢輕議十四日  
伏蒙發示會問招擬臣反覆看得張延齡殺人罪狀已  
明誠不可宥而謀逆之情未明故以一得之愚上請非  
以其真有逆情尚敢以孝皇帝懿親請皇上有宥之也隨  
蒙聖諭責臣以左右大臣必為我皇祖保有天下以殺

逆賊同姓尚處死况懿親乎臣伏讀無任戰懼之至臣  
伏思皇上欲察延齡逆情真與不真行法當與不當請  
自今日在朝人心觀之也夫延齡兄弟當孝宗武宗時  
朝士多相交往臣時雖未入仕竊嘗聞之武宗彌留之  
際皇上迎繼大統未至京師閣臣上托昭聖皇太后懿  
旨挾人輒自處斷彼時威權內外已震懼矣迨夫皇上  
嗣統閣臣等乃輒敢以皇上考孝宗母昭聖凡在朝者  
靡不翕從昭聖因自以有擁立之恩以子皇上為當然

以致聖母至京莫知所以接見之禮皆臣下謬妄之罪  
以悞昭聖也彼時臣初為進士未嘗受皇上一命之寄  
皇上亦未嘗識臣為何如人臣只因見得道理之真故  
敢以一人犯天下之怒幸賴聖明在上裁決不然臣萬  
死無益也今朝士恨臣之心實未嘗一日肯忘每欲相  
時報復雖昭聖皇太后之心恐亦未嘗一日忘臣者也  
嘗有人以斯言告臣者臣答之曰臣子事君惟盡此心  
之誠若夫成敗利鈍則在乎天而已臣自誓此心至死

靡他也今者延齡情發臣觀內外大小臣工俱默默無言雖言官亦無敢言孰是孰非者何也實皆幸皇上今有此舉以為悉由議大禮中來得皇上誅滅延齡家俾昭聖皇太后不得善終以深皇上之過以為臣及獻夫陽為解釋陰為佐助以重臣二人之罪莫逃於天下後世其設心如此而已特聖明偶未之察臣連日伏思延齡殺人之罪誠不可宥皇上即殺之無得而議也其他如臣前議以處鶴齡或置之南京不得留住京師以

滋惑仁壽宮之心臣之愚見盡忠於皇上者不過如此夫亂臣賊子人人得而討之况臣為左右大臣又受恩深重者乎設使延齡真有逆謀而臣得見之真即當首倡大義請加天討而族滅之又敢為之隱匿自甘為叛逆之黨乎臣詳招詞所稱曹祖鼓狀有曰天曹抱送六丁六甲及天神護伊之說皆涉妖言皇上聰明天縱必能察悉孟軻氏曰行一不義殺一不幸而得天下有弗為也而况謀逆之罪滅人族數臣於延齡此項罪狀實

見得未真豈敢妄為議擬無所可否而重為聖德之累  
乎臣又思皇上此等訪據皆未知出於何人或彼一時  
不思干係國家憲典重大或出一時報復之私卒難收  
救聖明亦必自加察臣又思前次退休山中皇上召臣  
催敕內云自卿去後切轉朕思聖母嗟問者亦數次矣  
臣伏讀流涕哽咽臣思皇上所以思臣聖母所以數問  
臣者臣之心豈惟皇上鑒之聖母亦鑒之矣茲者天眷  
聖明誕生皇嗣國本綿長萬祺衍慶或以臣言上聞聖

母亦必欲皇上寬法以處延齡之家者也誠或不察真情必欲斷成謀逆之獄則當如律行法族滅張氏矣昭聖皇太后不知何以處之臣竊恐皇上之心必有所不安聖母之心亦所不安者矣臣承聖明厚恩重託君臣一體休戚相同憂之也深故言之也切慮之也遠故說之也詳伏乞聖明俯賜加察焉

文章辨體彙選卷一百十二

欽定四庫全書

文章辨體彙選卷一百十三

明 賀復徵 編

疏二十七

上下一心同濟聖治疏

明湛若水

臣近觀進忠言者或斥奸邪之惡或規聖政之缺皆蒙聖德包容而未見繹改近幸未見憂悔二者益未知安危利害之相關是以不能遂痛切而猛省也臣得以近

事明之陛下龍飛水國習知舟事請以舟喻謗云同舟共濟豈不信哉豈不信哉夫天下猶一大舟也治亂安危未有津畔猶濟大海也本在人主之一心猶夫舟之柁也公卿賢士輔導之臣運籌指方猶夫舟之有長年三老也百僚宣力猶夫篙師榜人為之左右也內臣外戚猶夫附舟之人也天下民庶實為邦本猶夫君之寶貨任載也故附舟之人與寶貨之利害在舟之安危舟之安危在柁之張弛柁之張弛在長年三老之操縱而

篙師宣力與否也故舟危則凡在舟者莫不危舟安則  
凡在舟者莫不安有恃寵壞法以敗人國家如同舟之  
人鑿舟而破之自以為安而鮮不失者如先朝之跡而  
不知鑒也可謂智乎故欲濟中興之善治者莫若正君  
心欲正君心者莫若親輔導知學之臣欲親輔導知學  
之臣莫若左右僕從勿用匪人故一正君心而萬化理  
矣諺云同行同命君臣内外以之今陛下不親儒學之  
臣不聞正心之術朝綱不振宰制不施初政漸不克終

近習漸為蒙蔽天戒屢見不實修省科道大臣交章未獲舉行臣恐如舟之柁漸弛矣左右親信之人蠱惑上心不引之以聲色則引之以異教親戚希無厭之賞近幸奪法司之獄刑罰僭差紀綱廢弛是皆所謂同舟之人鑿舟而破之而不知自溺之禍者矣大臣見斥則將相繼求去如尚書林俊孫交者百僚視之以為進退者也今人懷危心是猶長年三老蒿師榜人引去而誰與宣力矣天下萬民莫為匡濟臣實痛心渺乎不知舟之

安危也伏乞陛下察同舟之義講學以正心親禮大臣  
聽用科道百僚以輔理戒諭左右親幸之人使勿壞事  
鑿舟以自溺則內外臣工庶咸有濟於無涯之福矣臣  
非糾劾之官然職在以學術開導人主誠有所見不敢  
不陳

除邪妄以彰聖化疏

夏言

比者恭遇皇上詔及羣臣欲除去禁中釋殿奉建兩宮  
以備一代之制一時廷議翕然仰贊皇上篤養盡制之

孝闢邪崇正之化盛德大業光前振後矣今月十一日  
伏奉聖旨命大學士臣李時同臣言入看即所謂大善  
殿者臣等看得殿內有金銀鑄像鉅細不下千百且多  
陰陽交接之狀仰惟聖明燭其誕妄不經一旦奮然舉  
而除之甚盛舉也但臣見諸几案之上及懸皮梁栱之  
間與夫金函之所藏貯者為物尚多不可識辨問之守  
者且云是為佛骨是為佛牙枯朽摧梨奇離碨礧計不  
下千斤臣惟佛法之入中國自漢明帝時始然不過人

誦其書習其教而已至唐憲宗朝乃迎佛骨至京師其  
臣韓愈上表極言其邪穢不祥不宜以入宮禁憲宗不  
能聽且深臯愈竟遠斥之臣意自是厥後人莫敢矯其  
非凡番民持以誑惑中國之人而名為佛顱佛骨者相  
屬於道由是流入天子宮禁之內歷世皆然而不以為  
異今殿中所有未必非勝國所遺累朝以來亦必以為  
彼法則然未嘗深究以延至今茲者恭惟皇上躬堯舜  
禹湯文武之資行堯舜禹湯文武之道所始議撤佛屋

毀除穢像使詭異之形不得瀆留清禁此真卓越千古  
之見出於尋常萬萬者也然殿宇像設既除所有前項  
佛顱佛牙之類皆屬污穢不宜使之尚存臣請乞以此  
物勅下所司瘞之草野一切掃而淨之以永杜愚冥疑  
惑之端實為大聖人非常作為有補名教甚大功德罔  
極臣不勝幸甚後世幸甚緣係除邪妄以彰聖化事理  
未敢擅便謹題請旨

議處本兵邊方督撫兵備疏 高拱

臣惟兵部尚書即古大司馬之職所以統六師平邦國安危所係任至重也况二三十年来邊關多事調度為難則其任尤重所宜多需其才用之不竭然後可以濟事而乃遇有員缺皇皇求索不得其人豈果世之乏才與良由養之不預是以不能卒得於臨時也臣觀兵部侍郎止如別部額設二員蓋邊關無事之時則然也近年既稱邊關多事而官則如舊或間添一員協理戎政然又時用憲臣侍郎亦非定員則所謂定員者止二人

而已而二人者皆協理部事不得隨時出入或欲巡閱  
邊務未免假借於他官或遇邊方總督員缺未免那移  
於他處假借他官則非其本職不便行事那移他處則  
補於東又缺於西且彼此候代道途遙遠動經歲時不  
得履任門庭緊急之事無人為禦臣不意國家如此大  
事而乃苟且以處至此也臣愚誠中夜以思謂宜於兵  
部添設侍郎二員同額設侍郎協理部事平日則練習  
本兵政務或欲巡閱邊務即以一人往既便行事又不

煩於假借或遇邊方總督員缺即以一人往既可朝發  
夕至又不費於那移迨其出入中外閱歷既深凡本兵  
政務與夫邊關險隘軍情緩急將領賢否士馬強弱皆  
已曉暢諳熟方畧素定遇有尚書員缺即以其尤深者  
補之如此而猶稱乏用必不然也然兵乃專門之學非  
人人皆可能者若用非其才固不能濟若養之不素雖  
有其才猶無濟也臣愚謂儲養本兵大臣即當自兵部  
司屬始蓋兵部司屬皆預聞軍旅之事而乃不擇其人

泛然以用又往往遷為他官不得其人既未必可用而  
又遷為他官則人無固志視為傳舍不肯專心於所職  
如此者非惟無以備他日之用而目下承行亦有不當  
者矣今宜特高其選而以有智謀才力者充之使其專  
官於此練習事務不復他遷而又議其陞格如邊方兵  
備缺即以兵部司屬補邊方巡撫缺即以邊方兵備補  
邊方總督缺即以邊方巡撫補而總督與在部侍郎時  
出時入以候尚書之缺譬之通政鴻臚然待次於下魚

貫而進其他官中有特出之才能知兵事者又間取一二以補不足如此而猶稱乏用必不然也然臣又思之養才雖足以備用然勸懲不明何以盡人力體悉不周何以盡人心臣見邊方之臣涉歷沙漠是何等苦寒出入鋒鏑是何等艱險百責萃於是何等擔當顯罰繩於後是何等危懼其為情苦視腹裏之官奚啻十倍而乃與之同論俸資同議陞擢甚者且或後焉此功臣所以灰心烈士為之太息者也誠宜特示優厚有功則加

以不測之恩有缺則進以不次之擢使其功名常在人先他官不得與之同論俸資脫或推奸誤事則律以法脫或任職不稱則在其官使其功名常在人後尚不得與他官同論俸資夫稱職者常先則人必欣於進取不稱職者常後則人必懼於蹭蹬如是而猶不盡力必不然也至於人力有限窮則不支臣又見邊關總督之臣用之不效者既蒙顯罰而用之效者乃不蒙顧惜事一入手更無援助更無代替使其頻年累歲常受苦辛非

惟不得息肩抑且不遑喘息直至肝腦塗地而後已斯  
其情不尤苦乎若使儲養有素用不乏人自可行通融  
休假之法如其在邇日久著有成績則特取回部以休  
假之休假之後不妨再出使其精神得息而不疲知慧  
長裕而不竭以勤王事為濟必多且臣子馳驅之苦既  
在上者所深體而君父體念之意亦在下者所周知君  
臣之義即同父子之恩如是而人不盡心必不然也臣  
受皇上眷任誓圖報稱見得邇事廢弛必須得人乃可

振起而用人不得其道乃如此若及今不為之所恐因循愈久愈難收拾可終任其廢弛而已乎故願為我皇上早為設處以濟目前之急預為儲養以備他日之用安攘之計或莫先於此也伏望聖明裁斷勅下該部施行不勝幸甚

議處邊方有司疏

高拱

臣惟薊遼山陝沿邊有司雖是牧民之官實有疆場之責邊騎蹂踐既難支持百姓凋殘又難綏撫即以有才

力者為之猶懼不堪即優厚而作興之猶恐不振乃官其地者非雜流則遷謫非遷謫則多才力不堪之人謂以劣處之也彼其用之腹裏尚然罔效又何有於邊方待之既薄志意隳阻又何望於展布是以善政無聞而郡邑之狼狽為甚皆是用人不當所致蓋徒以地苦其人而曾不顧人之苦其地也蓋徒以邊方為遠地而曾不思遠地安然後內地得以安也及今若不亟處恐日復一日狼狽愈極而不可收拾所關非細臣惟國家用

人不當為官擇地只當為地擇官今邊方既係要緊之地又皆狼狽則尤宜以賢者處之合無今後各邊有司必擇年力精強才氣超邁者除補或查治有成績兼通武事者調用而又議其賞罰有能保惠困窮俾皆樂業者以三年為率比內地之官加等陞遷有能捍患禦敵特著奇績者以軍功論不次擢用如其才畧恢弘可當大任即由此為兵備為巡撫為總督無不可者惟以治效為準不必論其出身資格若乃用之不效無益地方

者降三級別用若乃觀望推委以致悞事者輕則罷黜  
重則軍法治罪夫既開功名之路以歆之於前則不肯  
不盡其心又有嚴罰以繩之於後則不敢不盡其力庶  
乎修職者多而邊方有賴也然臣又思功名之路既開  
則又有本是腹裏而借邊方省分之名以圖幸進者亦  
不可不預為一定之說臣等查得薊遼則昌平順義密  
雲懷柔薊州玉田豐潤遵化平谷遷安撫寧昌黎樂享  
延慶永寧保安自在安樂等州縣山西則河曲臨縣忻

州崞縣代州五臺繁峙定襄永寧寧鄉岢嵐嵐縣興縣  
靜樂保德大同懷仁渾源應州山陰朔州馬邑蔚州廣  
靈廣昌靈丘等州縣陝西則固原靜寧隆德安定會寧  
蘭州環縣安塞安定保安清澗綏德米脂葭州吳堡神  
木府谷等州縣此六十一處乃是邊方前項事宜惟當  
行之於此其他雖是薊遼山陝所屬不得槩以邊稱徒  
資幸路其各府佐貳在邊任事者賞罰亦同前議則事  
體有定不可復有假借者矣臣因見得沿邊郡邑敝壞

必當為日夜念此至熟故敢特效其愚伏望聖明裁斷施行邊方幸甚

宣諭將士疏 趙貞吉

題為宣諭事本月二十一日准臣奏為獻計破敵事今敵大營在通州先鋒環繞京城不先挫其鋒則敵益驕不可制矣臣愚妄謂宜急遣近侍有才猷辯博官一員捧詔詣各軍營激勵三軍之士許開損軍之令許令將士義勇軍民人等人自為戰各得一首級者見賞銀一

百兩如有將官等逗遛觀望不進者亦許本官指名參奏在不失機宜其賞功銀兩須差錦衣衛官校押付各營紀功官員隨同本官刻期發行待事定之日令如故惟皇上命當事大臣議其便宜行之欽蒙皇上准臣論事陞臣一官兼風憲職銜奉敕宣諭城外各營將士寬其損軍之罪重其賞功之格臣於本月二十二日酉時領敕二十三日前詣城外總兵官咸寧侯仇鸞等營宣揚聖意激勵勇敢二十四日早再至鸞營令其督軍前

去勦捕零賊驚以為雨大未可動臣以為此雨天之所  
賜乃敵騎失利之時正我軍出奇之際今傳聞寇往白  
羊口出去臣以為白羊等處皆山隘險塞去處而此賊  
止其一支又以搶掠財畜極多輜重為累若用奇兵趨  
出賊前令賊回尋古北口故道則我三軍大戰可獲大  
克若放賊使出待其半渡縱兵擊之可獲半克若止望  
敵塵追之則為無策今朝廷開曠蕩之恩令爾將官各  
得展布軍士又遇此出格之賞且敵入山險之中復值

雨水如此乃邊騎大敗之日將軍立功之秋也鸞聞臣言即應曰此去定當大殺賊將官軍士莫不感激思奮即時前去臣仍宣諭城西城東城南守護等營畢尚有宣府總兵官趙國忠一營在沙河迤北離城尚遠臣未經辭朝不敢擅去已令總兵官仇鸞差夜不收齋捧臣宣諭告示彼中將士訖二十五日卯時進城臣才薄識短不能仰答我皇上激厲將士之至意臣不勝悚懼待命之至

議邊事疏 趙貞吉

奏為懇乞聖明賜解輔贊重任退供講職以明臣節以圖報稱事臣於本年八月二十二日伏蒙聖恩命臣以本官兼文淵閣大學士同李春芳等在內閣辦事臣於次日廷謝畢復面恩講筵蒙天語叮嚀命臣盡心輔佐贊理政事欽此臣於時稽首仰對謂近日朝廷紀綱邊防政務多有廢弛臣欲捨身任事未免招怨伏望皇上與臣作主張容臣得以盡力臣誓不敢有負任使以干

明典伏蒙諭旨知道了欽此臣感恩圖報一念之誠於是淪洽骨髓矣至九月內聞敵入大同大肆殺掠總督陳其學握兵觀望於懷來宣府之間總兵趙岢棄鎮遠避於應州方域之境巡撫李秋副將麻錦等皆閉門鎖堡以自全夫高位重祿之臣有封疆守備之責者坐視敵騎深入屠殺生民曾不能發一矢以向賊其心固已忍其罪亦已重矣然又於旬日之後敵騎尚未退情乃輒敢上誇功獻捷之疏以欺罔天聽是誠何心哉人臣

之罪寧復有大於此者乎當有巡按御史燕儒宦歷陳  
該鎮文武之臣失事之由及地方殘傷之狀以聞又該  
刑科給事中查鐸雲南道監察御史王圻劾陳其學趙  
奇掩敗為功扶同欺罔之罪一時朝廷之上公論賴之  
稍明奈何該科該部襲守近年舊套在科則為漫然兩  
可避匿之參在部則為肆然庇護再查之覆蒙皇上發  
下內閣令臣等看詳擬票聞臣即與大學士李春芳說  
道國家之事最重者在邊防欲整理邊防在正朝廷紀

綱耳賞罰乃紀綱之大者若大同一鎮功罪不明賞罰不當則諸邊視效因循怠玩皆不可復整理矣此乃社稷之計也我輩則社稷之隸又安可不勉乎皇上虛懷委任我輩若不任怨烏能修政立事以報答聖主之知遇哉今正大同之罪只以祖法國是公論清議八箇字斷之足矣主將不固守祖法也隆慶元年皇上處治薊州山西失事之律國是也大同巡按所奏科道所劾公論也當事之臣請賂不行持法不廢清議也守祖法定

國是張公論畏清議非我輩其誰哉我輩若守得此八  
箇字堅定則何事不可立何政不可修又何懼於任怨  
哉於時閣臣不以臣言為然臣亦隱忍不敢瀆聞者以  
為俟其再查果如奏劾所論則請正其罪未晚也今該  
巡按燕儒宦覆查失事罪狀益加詳著况未經再查之  
先大同失事之情弊已昭布人人之耳目而不可掩矣  
今兵部題覆仍循回護之方閣臣擬票尚存姑息之意  
臣備員密勿與參謀斷但自顧才識俱出諸臣之下欲

爭論而力不能徒抱學古之愚終鮮匡時之智故懷慙  
而思退矣竊念臣今年已六十二歲來日匪多效忠無  
術若旅進旅退惟知戀此崇階患得患失不思有忝衆  
職則臣壯歲所存之志將與齒髮俱衰而人臣守正之  
節於是大壞矣此臣之所以自傷而不敢不以之自勵  
者也故敢冒萬萬死罪哀鳴於君父之前乞解輔職以  
避賢路退就講官勉修舊業蓋臣自揣綿力不堪恐負  
聖明委托之重又思洪業未報猶願輸涓埃仰答之私

以此自白其心求無愧於自獻之言耳

直言天下第一事疏 海瑞

臣聞君者天下臣民萬物之主也惟其為天下臣民萬物之主責任至重凡民生利病一有所不宜將有所不稱其任是故養君之道宜無不備而以其責寄臣工使之盡言焉臣工盡言而君道斯稱矣昔之務為容悅阿諛曲從致使災禍隔絕主上不聞者無足言矣過為計者則又曰君子危明主憂治世夫世則治矣以不治憂

之主則明矣以不明危之母乃使之反求眩瞀莫知趨  
舍矣乎非通論也臣受國厚恩矣請執有犯無隱之義  
美曰美不一毫虛美過曰過不一毫諱過不為悅諛不  
暇過計謹披瀝肝膽為陛下言之漢賈誼陳政事於文  
帝曰進言者皆曰天下已治已安矣臣獨以為未也安  
且治者非愚則諛夫文帝漢賢君也賈誼非苛責備也  
文帝性仁頗柔慈恕恭儉能有愛民之美優游退遜尚  
多怠廢之政不究其弊所不免槩以安且治當之愚也

不究其才所不能槩以政之安且治頌之諛也陛下自  
視於漢文帝何如陛下天資英斷睿識絕人可為堯舜  
可為禹湯文武下之如漢宣之勵精光武之大度唐太  
宗之英武無敵憲宗之志平僭亂宋仁宗之仁恕舉一  
節可取者陛下優為之即位初年剗除積弊煥然與天  
下更始舉其大槩箴敬一以養心定冠履以辨分除聖  
賢土木之像奪宦官内外之權不當祀毀不與祀祀孔  
子推及所生天下忻忻然以大有所為仰之識者謂輔

相得人太平指日可期非虛語也高漢文帝遠甚然文帝能充其仁恕之性節用愛人呂祖謙稱其不盡人之財情是也一時天下雖未可盡以治安予之然貫朽粟陳民多康阜三代之後皆稱賢君焉陛下則銳精未久妄念牽之而去矣反剛明而錯用之謂長生可得一意玄修富有四海不曰民之脂膏在是也而興修土木二十餘年不視朝綱法紀弛矣數行推廣事例名節濫矣二王不相見人以為薄於父子以猜疑誹謗戮辱臣下

人以為薄於君臣樂西苑而不返宮人以為薄於夫婦  
天下吏貪民不聊生水旱靡時盜賊滋熾自陛下登極  
初年亦有之而未甚也今賦役煩增萬方則效陛下破  
產禮佛日甚室如懸磬十餘年來天下極矣天下因即  
陛下改元之號而臆之曰嘉靖者言家家皆淨而無財  
用也邇者嚴嵩罷相世蕃極刑差快人意一時稱清時  
焉然嚴嵩相之後猶之嚴嵩未相之先而已非大清  
明世界也不及漢文帝遠甚天下之人不直陛下久矣

內外臣工之所知也知之而諱語詩云袞職有闕惟仲  
山甫補之今日所賴以弼棐匡救格非以歸正諸臣責  
也夫聖人豈絕無過舉哉古者設官亮采惠疇足矣不  
必責之以諫保氏掌諫王惡不必設之也木繩金礪聖  
賢不必言之也乃修齋建醮相率進香天桃天藥相率  
表賀建興宮室工部極力經營取香覓寶戶部差求四  
出陛下誤舉諸臣誤順無一人為陛下正言焉都俞吁  
唏之風陳善閉邪之義邈無聞矣諛之甚也然愧心餒

氣退有後言以從陛下昧沒本心以歌頌陛下欺君之罪何如夫天下者陛下之家也人未有不顧其家者內外臣工有官守有言責皆所以奠陛下之家而盤石之也一意玄修是陛下之心惑也過於苛斷是陛下之情偏也而謂陛下不顧其家人情乎諸臣顧身念重得一官多以欺敗不事事敗有不足以當陛下之心者其不然者君心臣心偶不相值也遂謂陛下為賤薄臣工諸臣正心之學微所言或不免已私或失詳審誠如胡

寅撓亂政事之說有不足以當陛下之心者其不然者  
君意臣意偶不相值也遂謂陛下為是已拒諫執陛下  
一二事不當之形跡億陛下千百事之盡然陷陛下誤  
終不釋諸臣欺君之罪大矣記曰上人疑則百姓惑下  
難知則君長勞今日之謂也為身家心與懼心合臣職  
不明是以一二事形迹既為諸臣解之矣求長生心與  
感心合有辭關於臣君道之不正臣請再為陛下開之陛  
下之誤多矣大端在修醮修醮所以求長生也自古聖

賢止說修身立命止說順受其正蓋天地賦予於人而為性命者此盡之矣堯舜禹湯文武之君聖之盛也未能久世不終下之亦未見方外士自漢唐宋存至今日使陛下得以訪其術者陶仲文陛下以師呼之仲文則既死矣仲文尚不能長生而陛下獨何求之至為天賜仙桃藥丸怪妄尤甚宋真宗獲天書於乾祐山孫奭諫曰天何言哉豈有書也桃必採而後得藥由人工搗以成者也茲無因而至桃藥是有足而行耶天賜之者有

手執而付之耶陛下玄修多年矣一無所得至今日左  
右奸人逆陛下玄修妄念區區桃藥之長生理之所無  
而玄修之無益可知矣陛下又將謂懸刑賞以督率臣  
下分理有人天下無不可治而玄修無害矣乎夫人幼  
而學既無致君澤民異事之學壯而行亦無致君澤民  
殊用之心太甲曰有言逆於女心必求諸道有言遜於  
女志必求諸非道言順者之未必為道也即近觀嚴嵩  
有一不順陛下者乎昔為貪竊今為逆本梁材守道守

官陛下以為逆者也歷任有聲官戶部者至今首稱之  
雖近日嚴嵩抄沒百官有惕心焉無用于積賄求遷稍  
自洗滌然嚴嵩罷相之後猶之嚴嵩未相之前而已諸  
臣寧為嚴嵩之順不為梁材之執今甚者貪求未甚者  
揆日見稱於人者亦廊廟山林交戰熟中鶻突依違苟  
舉故事潔已格物任天下重使社稷靈長終必賴之未  
見其人焉得非有所牽制其心未能純然精白使然乎  
陛下欲諸臣惟予行而莫違也而責之以效忠付之以


翼為明聽也又欲其順乎玄修土木之設是股肱耳目  
不為腹心衛也而自為視聽持行之用有臣如儀衍焉  
可以成得志與民由之之業無是理也陛下誠知玄修  
無益臣之改行民之效尤天下之安與不安治與不治  
由之翻然悔悟日視正朝輔宰九卿侍從言官講求天  
下利害洗數十年道君之誤置其身於堯舜禹湯文武  
之域使其臣亦洗數十年阿君之恥置其身於臯陶伊  
傅之列相為後光明良喜起都俞吁唏內之宦官宮妾

外之光祿寺厨役錦衣衛恩廕諸衙門帶俸舉凡無事  
而官者亦多矣上之內厨內庫下之戶工部諸廠段絹  
糧料諸寶器用木材諸物多而積於無用用之非所宜  
用亦多矣諸臣必有為陛下言者諸臣言之陛下行之  
此則在陛下一節省間而已京師之一金田野之百金  
也一節省而國有餘用民有益藏不知其幾也而陛下  
何不為之官有職掌先年職守之正職守之全而未行  
之今日職守之廢職守之苟且因循不認真不盡法而

自以為是敦本行以端士習止上納以清仕途久任吏  
將以責成功練選軍士以充召募驅緇黃遊食使歸四  
民責府州縣兼舉富教使成禮俗復屯鹽本色以裕邊  
儲均田賦差丁以蘇困敝舉天下官之侵漁將之怯懦  
吏之為奸刑之無少姑息焉必世之仁博厚高明悠遠  
之業諸臣必有為陛下言者諸臣言之陛下行之此則  
在陛下一振作間而已一振作而諸廢具舉百弊剗絕  
唐虞三代之治粲然復興矣而陛下何不為之節省之

振作之又非有所勞於陛下也九卿總其綱百職分其任諸撫按科道糾舉肅清之於其間陛下持其大綱稽治效而責成焉勞於求賢逸於任人如天運於上而四時六氣各得其序恭已無為之道也天地萬物為一體固有之性也民物熙浹薰為太和而陛下性分中自有真樂矣可以贊天地之化育則可以與天地參道與天通命由我立而陛下性分中自有真壽矣此理之所有可旋至而立效者也若夫服食不終之藥迷望輕舉理

之所無者也理之所無而切切然散爵祿竦精神玄修  
求之懸思鑿想繫風捕影終其身如斯而已矣其可乎  
夫君道不正臣職不明此天下第一事也於此不言更  
復何言大臣持祿而外為諛小臣畏罪而面為順陛下  
有不得知而改之行之者臣每恨焉是以昧死竭忠慘  
憐為陛下言之一反情易向之間而天下治與不治民  
物之安與不安決焉伏惟陛下留神宗廟幸甚天下幸  
甚臣無任戰慄恐懼之至



文章辨體彙選卷一百十三